

**Bil. 62**

**Selasa**

**3 Disember 2019**



**MALAYSIA**

# **PENYATA RASMI PARLIMEN**

*Parliamentary Debates*

## **KAMAR KHAS**

*Special Chamber*

**PARLIMEN KEEMPAT BELAS  
PENGAL KEDUA  
MESYUARAT KETIGA**

## KANDUNGAN

### UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Pembekalan Racun Makhluk Perosak oleh  
NAFAS di bawah SIPP**  
- *YB. Tuan Chan Ming Kai (Alor Setar)*

[Halaman 1]

**MALAYSIA  
KAMAR KHAS  
PARLIMEN KEEMPAT BELAS  
PENGKAL KEDUA  
MESYUARAT KETIGA**

**Selasa, 3 Disember 2019**

**Mesyuarat dimulakan pada pukul 2.30 petang**

**DOA**

*[Timbalan Yang di-Pertua (Dato' Mohd Rashid Hasnon)  
mempengerusikan Mesyuarat]*

---

**UCAPAN DI BAWAH USUL  
BERKENAAN PERKARA TADBIR KERAJAAN (P.M. 17)**

**Pembekalan Racun Makhluk Perosak oleh NAFAS di bawah SIPP**

**2.34 ptg.**

**Tuan Chan Ming Kai [Alor Setar]:** Terima kasih Tuan Yang di-Pertua dan Yang Berhormat Timbalan Menteri Pertanian dan Industri Asas Tani. Saya ingin menarik perhatian pihak kementerian ke atas isu pembekalan racun makhluk perosak yang dikendalikan oleh NAFAS di bawah Skim Insentif Pengeluaran Padi (SIPP).

Untuk makluman Menteri, sebanyak 85 jenis kategori racun dibekalkan oleh 13 buah syarikat pembekal racun kepada NAFAS. Terdapat syarikat pembekal mengalami masalah *cash flow* dengan izin disebabkan hutang yang NAFAS lambat bayar. Minta Menteri senaraikan hutang terkini NAFAS kepada setiap syarikat. NAFAS bertanggungjawab mengemukakan laporan kerana sebanyak RM140 juta peruntukan kerajaan telah dibayarkan untuk tujuan ini. Maka ini bukan semata-mata urusan peribadi kerana kegagalan pengendalian bagi pihak syarikat akan memberi kesan buruk kepada pasaran yang berniaga dengan kerajaan dan memburukkan nama baik pengurusan kerajaan.

Minta Menteri menjelaskan juga SOP *consignment*, dengan izin bagi pembekalan racun oleh syarikat kepada PPR MADA. Terdapat isu di mana PPR MADA membuat kiraan stok diguna dan mengeluarkan *purchase order* dengan izin lewat berbulan-bulan sehingga bayaran lambat yang membebankan syarikat. Pengiraan stok diguna tidak termasuk stok yang terkurang tanpa daftar atau hilang. Maka syarikat terpaksa tanggung dan jagaan PPK.

Minta Menteri menjelaskan juga harga racun yang agak mahal. Produk racun Akara (500g) dan Akes (300g) yang dibekal oleh MADA Corp. kepada NAFAS dengan harga RM85.55 dan RM75.45 masing-masing telah dijual oleh NAFAS dengan harga RM93.00 dan RM83.00 masing-masing dengan alasan bahawa harga pasaran adalah RM98.00 dan RM88.00 masing-masing.

Akan tetapi, semakan yang telah saya buat di pasaran adalah harga serendah RM80.10 dan RM71.60 bagi kedua-dua racun tersebut. Minta Menteri menjelaskan cara semakan harga pasaran dibuat dan bagaimana dapat memastikan harga bekalan adalah berpatutan supaya mengurangkan pembaziran dalam peruntukan yang digunakan untuk kontrak pembekalan racun di bawah skim SIPP.

Minta Menteri membuat kajian semula kontrak pembekalan racun supaya memastikan subsidi diberi memberi manfaat yang sebaik mungkin dan minta pandangan kementerian sama ada boleh mewujudkan skim subsidi racun yang baru dengan secara terus kepada pembekal supaya mengurangkan pembaziran. Sekian, terima kasih.

### **2.36 ptg.**

**Timbalan Menteri Pertanian dan Industri Asas Tani [Tuan Sim Tze Tzin]:** Terima kasih Tuan Yang di-Pertua.

Untuk makluman Ahli Yang Berhormat daripada Alor Setar, Pertubuhan Peladang Kebangsaan (NAFAS) merupakan pembekal yang telah dilantik oleh pihak kerajaan untuk membekalkan racun makhluk perosak di bawah Skim Insentif Pengeluaran Padi (SIPP). Pada masa ini, hanya 11 pembekal dengan 63 jenis kategori produk (71 saiz pembungkusan) membekalkan racun makhluk perosak yang dikendalikan oleh NAFAS. Syarat kelayakan bagi penerimaan racun makhluk perosak adalah sebanyak RM200 satu hektar. NAFAS bertindak sebagai pembekal dan pengedar racun makhluk perosak kepada pesawah dan kos-kos seperti kos operasi serta pengedaran sehingga penerimaan pesawah adalah di bawah tanggungan NAFAS.

Untuk makluman, senarai hutang terkini sehingga 15 November 2019 di antara NAFAS dan pembekal racun adalah berjumlah RM71,067,666.53 termasuk RM7,032,297.04 bagi tahun 2018. Walau bagaimanapun, NAFAS telah menjelaskan keseluruhan bayaran kepada pembekal pada tahun 2012 sehingga 2017 kepada pembekal racun.

Bermula tahun 2015, kaedah pembekalan racun perosak dan penyakit secara *consignment* dilaksanakan oleh Pertubuhan Peladang Kawasan Lembaga Kemajuan Pertanian Muda (PPK MADA) berdasarkan persetujuan bersama antara MADA-NAFAS setelah dibentangkan dan dibincangkan di dalam Jawatankuasa Penyeliaan Peringkat Zon dan Induk SBPKP dan SIPP.

Melalui kaedah ini, syarikat pembekal akan menempatkan stok racun di PPK sebelum dan sepanjang musim penanaman agar racun yang diperlukan oleh pesawah tersedia di PPK untuk dipilih dan dapat digunakan oleh pesawah mengikut keperluan sebenar masa dan jenis racun. Pembekal diberi pilihan untuk meletakkan barangan secara *consignment* di PPK MADA secara percubaan dan sukarela.

Pembekalan melalui kaedah ini memberi kelebihan kepada pesawah kerana pesawah dapat membuat pemilihan jenis racun yang tepat dan bersesuaian dengan jenis perosak dan penyakit pada ketika berlaku serangan di petak sawah. Pesawah akan mendapat bekalan racun diperlukan di PPK dari semasa ke semasa sepanjang tempoh penanaman bagi musim tersebut.

Pembekalan racun makhluk perosak di kawasan jelapang yang lain dan kawasan tanaman padi lain adalah melalui kaedah pesanan awal (*preorder*) yang dibuat oleh PPK berdasarkan pilihan pesawah semasa proses pendaftaran baja di awal musim.

#### ■1440

Melalui kaedah ini, pesawah akan membuat ramalan terhadap perosak dan penyakit yang akan berlaku pada musim tersebut berdasarkan rekod serangan pada musim sebelumnya. Walau bagaimanapun, terdapat kemungkinan bahawa jenis racun yang dipilih di awal musim adalah tidak tepat dan tidak dapat digunakan sekali gus menyebabkan pesawah terpaksa menanggung kos tambahan bagi pembelian jenis racun yang lain. Itu sebab *consignment* dilaksanakan ya.

Jadi melalui kaedah *consignment* ini, pesawah akan mula mengambil racun yang didaftar yang diperlukan di PPK bermula dari hari pendaftaran baja hingga 90 hari lepas tanam bergantung pada kesesuaian keperluan. PPK kebiasaannya mengeluarkan pesanan pembelian (*purchase order*) pada pertengahan musim atau setelah selesai proses pengambilan racun oleh pesawah kepada pihak NAFAS. Proses ini antaranya menyebabkan berlaku kelewatan pembayaran tuntutan oleh NAFAS kepada syarikat pembekal.

Walaupun bagaimanapun, sebagai langkah penambahbaikan proses pembekalan racun makhluk perosak ini dan prosedur tuntutan, pihak NAFAS telah menganjurkan satu bengkel bertujuan untuk membangunkan *standard operating procedure* bersama dengan PPK MADA pada 19 hingga 21 November 2019 yang lalu. Aspek penambahbaikan seperti tempoh tuntutan, kaedah pengendalian stok, keselamatan penyimpanan dan sebagainya telah diambil kira di dalam SOP ini. Ini adalah jangka masa pendek ya.

Untuk jangka masa panjang, kementerian akan mengkaji penyelesaian yang baru. Contohnya menggunakan *e-wallet* untuk bayar terus subsidi-subsidi kepada petani supaya petani boleh membeli racun-racun makhluk perosak terus daripada pembekal termasuk NAFAS dan juga

pembekal lain melalui *e-wallet*. Maka segala masalah dari segi birokrasi tidak wujud dan ia akan mengurangkan *cost of doing business* dan mengurangkan harga racun perosak.

Untuk makluman Ahli Yang Berhormat, harga jualan racun makhluk perosak di bawah SIPP ditentukan oleh Jawatankuasa Teknikal di peringkat Kementerian Pertanian dan Industri Asas Tani dengan syarat kepada pembekal, harga mestilah di bawah harga pasaran.

Penetapan harga bagi produk racun Akara (500g) dan Akess (300g) oleh MADA Corp. kepada pihak NAFAS adalah mengambil kira kos pengangkutan ke seluruh negara. Harga yang ditetapkan oleh Jawatankuasa Teknikal di bawah SIPP bagi kedua-dua produk tersebut RM93.00 dan RM83.00 masih di bawah harga jualan yang disyorkan oleh pengeluar iaitu masing-masing RM98.00 dan RM88.00.

Harga produk yang lebih rendah di pasaran terbuka tidak boleh dijadikan perbandingan memandangkan strategi pemasaran oleh pengedar adalah dipengaruhi oleh pelbagai faktor seperti kualiti belian, waktu promosi, kaedah bayaran dan juga fleksibiliti penawaran dan permintaan pasaran. Selain daripada itu, pihak NAFAS turut menyalurkan sebahagian keuntungan daripada jualan kepada PPK yang terlibat secara tanggungjawab sosial. Secara tidak langsung, para peladang turut menerima manfaat daripada keuntungan yang diperolehi oleh NAFAS di bawah skim ini. Sekian, terima kasih.

**Timbalan Yang di-Pertua [Dato' Mohd Rashid Hasnon]:** Ahli-ahli Yang Berhormat, Mesyuarat Kamar Khas ini ditangguhkan sehingga jam 2.30 petang, esok Rabu 4 Disember 2019.

***[Kamar Khas ditangguhkan pada pukul 2.44 petang]***